



BOSNA I HERCEGOVINA  
FEDERACIJA BOSNE I HERCEGOVINE  
KANTON SREDIŠNJA BOSNA/SREDNJOBOSANSKI KANTON  
MINISTARSTVO PROSTORNOG UREĐENJA, OBNOVE I POVRATKA

---

**ZAKON**  
**o proglašenju spomenika prirode**  
**«PROKOŠKO JEZERO»**  
**(nacrt)**

---

Travnik, siječanj 2005

Na osnovu člana 41, točka f Ustava Kantona Središnja Bosna/Srednjobosanskog kantona (SL. novine KSB/SBK 1/97, 5/97, 6/97, 2/98, 8/98, 10/00, 8/03 i 2/04) i člana 30. stav 9. Zakona o zaštiti prirode («Sl. novine Federacije BiH» broj:33/03), a po osnovu utvrđenog prijedloga Ministarstva za prostorno uređenje, obnovu i povratak, Skupština kantona na sjednici održanoj \_\_\_ .. 2005 godine donosi

## ZAKON

### o proglašenju spomenika prirode «PROKOŠKO JEZERO»

#### Član 1.

Ovim zakonom, Područje Prokoškog jezera, proglašava se Spomenikom prirode «Prokoško jezero» (u daljem tekstu: Spomenik prirode) kao kategorija zaštićenog područja i utvrđuju: granice obuhvata, zaštićene zone, aktivnosti u zaštićenom području, mjere zaštite korištenja prirodnih vrijednosti, upravljanje, kaznene odredbe i nadzor nad primjenom zakona.

#### Zaštićeno područje

#### Član 2.

Područje Prokoškog jezera smješteno je na planini Vranici, obuhvata prostor između dolina rijeke Vrbasa i dolina rijeke Bosne i njenih pritika Bistrice i Fojničke rijeke. Najviši vrhovi koji ujedno predstavljaju i granice istraživanog područja su na zapadu Nadkrstac (2110 m) sa koordinatama 43° 58' 30" N i 17° 43' 10" E, Krstac (2069 m) sa koordinatama 43° 58' 25" n i 17° 44' 20" E, na jugu Loćika (2107 m) sa koordinatama 43° 57' 20" N i 17° 44' 55" E, Treskavica (2023 m) sa koordinatama 43° 57' 35" N i 17° 45' 40" E, i Tikva (1922 m) sa koordinatama 43° 57' 55" i 17° 47' 10" E, te na istoku Stražica (1806 m) sa koordinatama 43° 58' 15" N i 17° 46' 40"E.

#### Granice obuhvata

#### Član 3.

Granica obuhvata spomenika prirode su definisane na osnovu elemenata hidrološkog režima vodosnadbijevanja jezera i geološkog sastava terena na kojem je izgrađena jezerska kotlina.

Katastarska općina u kojoj se nalazi cjelokupni obuhvat je K.O. Prokos.

Karta sa ucrtanom granicom spomenika prirode i granicama zaštićenih zona izrađena u mjerilu 1: 10000 je sastavni dio ovog zakona i čuva se u nadležnom kantonalnom ministarstvu za poslove zaštite okoliša.

## Zaštićene zone

### Član 4

U okviru granica Spomenika prirode, ukupne površine 2225 ha utvrđuju se tri zaštićene zone.

### Član 5

Prva zaštićena zona (A zona – nukleus) obuhvata površinu od 186 ha i predstavlja prostor najviših vrijednosti koji mora ostati u potpunosti očuvan.

Granica obuhvata Prve zaštićene zone polati sa južne strane od kote Debelo brdo (1858 m) odakle se spušta na orografsko sedlo od 1660 m na jugoistočnoj strani jezerskog basena. Od njega se granična linija hipsometrijski najprije uzdiže prema istoku na kotu Glavičica (1691 m) a zatim se u pravcu istok-sjeveroistok preko mase koluvijalnog matičnog stijenskog materijala spušta na manju morfološku glavicu od 1630 m ( $x = 6481116$ ,  $y = 4868173$ ). Od nje granična linija, prateći erozivno stijensko uzvišenje, naglo povija prema sjeverozapadu i poklapa se sa sa izohipsom od 1630 m sve do korita Jezernice ( $x = 6480767$ ,  $y = 4868474$ ), odakle ponovo skreće u smjeru istok-sjeveroistok do strmog krškog odsjeka Hrid. Dalje granična linija prelazi u sjever-sjeveroistočni pravac do Trebevića (1650 m;  $x = 6481513$ ,  $y = 4869269$ ) odakle naglo prelazi u smjer paralelničkog pravca pružanja i uzdiže se do vrha Čoso (1864 m). Prateći dalje orografsko razvođe Smiljevičke kose u smjeru zapad-jugozapad granična linija se dalje hipsometrijski najprije spušta na orografsko sedlo (1820 m) a zatim uzdiže prema vrhovima Guvno (1860 m) i Tikva (1922 m). Pravac pružanja granične linije je dalje uporednički (sjever – jug) do orografskog sniženja Travnička vrata (1810 m) odakle preovlađujućim jugoistočnim a zatim istočnim pravcem prati izohipsu od 1800 m do orografskog uzvišenja od 1817 m na jugozapadnoj padini jezerske kotline. Od njega se granica ponovo uporednički u južnom smjeru hipsometrijski najprije spušta do orografskog sedla na 1750 m nadmorske visine a zatim uzdiže do manje morfološke zaravni od 1860 m ( $x = 6480129$ ,  $y = 4867364$ ). Granična linija dalje gotovo paralelničkim smjerom povija u pravcu istok-sjeveroistok na Debelo brdo čime se zatvara prostorno obuhvat Zone I – nukleusa zaštićenog područja.

### Član 6.

Osnovne vrijednosti Prve zaštićene zone čine:

#### 1. Geološka raznolikost:

- u neposrednom prostoru jezerske kotline dominiraju formacije karbona i perma (C,P) predstavljene naslagama metariolita i rjede riolita.
- po neposrednom južnom obodu jezerske kotline ove naslage kontaktiraju pločaste krečnjake gornjeg i srednjeg devona ( $D_{1,2}$ ), koji su u formi nešto masivnijih razvijeni i na jugoistočno ekspaniranim padinama Smiljevičke kose kao i sa zapadne strane.

#### 2. Geomorfološka raznolikost:

- geomorfološki proces i oblici su predstavljeni elementima ograničene krške morfoskulpture erozivnog i akumulacionog tipa. Najtipičnije su brojne vrtače uglavnom metarskih dimenzija a pored njih su razvijeni i mikrooblici tipa manjih mrežastih škrapa.

- u prostoru sjevernog i sjeveroistočnog oboda su vrlo razvijeni padinski procesi oburvavanja, osipanja, spiranja i jaružanja koji rezultiraju obrazovanjem akumulativnih nakupina koluvijalno-proluvijalnog tipa erodovanog stijenskog materijala u podini. Sa zapadne strane su utvrđene nakupine od konglomerata i drobine.
- brojne gravitacione forme urniskog tipa u obliku haotično raspoređenih stijenskih blokova vidljive su po cijelom prostoru neposredne jezerske aluvijalne ravni.
- od morfoloških raznolikosti mogu se izdvojiti vrhovi: Debelo brdo, Glavica, Čoso i Tikva.

### 3. Hidrološka raznolikost

- glečersko Prokoško jezero,
- veći broj manjih jezerskih pritoka koje uglavnom nastaju od jačih izvora kontaktnog tipa i površinski difuzno pritiču u jezero. Najvažniji je Razvalinski potok, a od izvora Mujagin studenac. Sa sjeverne strane jezerske kotline je Suhojezerski potok koji ponire u dužini od oko 70 m. Glavna jezerska otoka je Jezernica

### 4. Biološka raznolikost

- endemična podvrsta alpskog tritona ( *Triturus alpestris* ssp. *reiseri*),
- visok procent endemičnih vrsta biljaka,
- veliki broj biljnih vrsta koje pripadaju kategorijama rijetkih, osjetljivih i ugroženih vrsta,
- visok stepen biocenološke raznolikosti, a posebno je značajna vegetacija oko izvora i potoka, te vegetacija snježnika, planinskih rudina i vriština, te različiti tipovi šuma subalpskog pojasa.

## Član 7.

Druga zaštićena zona (B zona – puferska) obuhvata prostor površine 732 ha koji je dovoljno očuvan kako za konzervaciju sopstvenih ekosistema, tako i ekosistema u nukleusu, te pruža mogućnost za istraživanja, edukaciju i duhovnu rekreaciju.

Granica obuhvata Druge zaštićene zone sa juga započinje od vrha Treskavica (2023 m) i u pravcu sjeveroistoka se spušta na kotu 1835 m. Pateći isti smjer ona se dalje spušta preko orografskog razvođa Zelena gromila na vrh Stražica (1806 m). Od njega mijenja pravac u sjeverni i spušta se na orografsko sniženje Sivka (1253 m) i dalje u smjeru sjever-sjeveroistok na dio lijeve strane doline rijeke Jezernice i dijela lijeve strane šumskog puta koji prati izohipsu od 1200 m. Na oko 120 m udaljenosti od velike krivine šumskog puta ( $x = 6482376$ ,  $y = 4869925$ ) granična linija povija u smjer zapad-sjeverozapad i uzdiže se prema vrhu Runjevica (1727 m) odakle se gotovo sjevernim smjerom spušta prema morfološkoj zaravni na 1605 m i dalje u smjeru zapada prati izohipsu od 1550 m do kote 1540 m. Pateći dalje istu izohipsu od 1550 m granična linija povija u pravcu jugozapada i odakle se spušta u prostor Smiljevače i dolinu Džehenemskog potoka na 1500 m visine ( $x = 6480197$ ,  $y = 4869787$ ). Od navedenih koordinata granična linija se u istom jugozapadnom smjeru najprije hipsometrijski uzdiže na vrh Vratolom (1847 m) a zatim spušta na sekundarnu visinsku kotu od 1720 m ( $x = 6479103$ ,  $y = 4868931$ ). Sjeverozapadno od travničkih vrata povija i hipsometrijski se spušta prema jugu i slijedeći orografsko razvođe prostora Široki do se uzdiže na vrh Krstav (2069 m). Južno od njega na oko 120 m udaljenosti dolazi se na općinsku granicu sa koordinatama:

$x = 6479227, y = 4867909, x = 6479378, y = 4867894, x = 6479568, y = 4867817, x = 6479641, y = 4867647, x = 6479689, y = 4867348, x = 6479956, y = 4866348, x = 6480090, y = 4866220$ ).  
Od posljednje koordinate granična linija skreće prema istoku na vrh Treskavica čime se zatvara prostorni obuhvat Zone II – puferske zone.

### Član 8.

Osnovne vrijednosti Druge zaštićene zone čine:

#### 1. Geološka raznolikost:

- predstavljena je istim geološkim članovima kao i u nukleusu osim što su unutar nje dijelom utvrđene i formacije silur-devonske starosti. Krečnjačke naslage su znatno moćnije i rasprostranjenije.

#### 2. Geomorfološka raznolikost:

- zbog znatno veće energije reljefa ove zone u odnosu na nukleus, svi istaknuti geomorfološki procesi su znatno izrazitiji.
- najvažniji elementi morfološkog diverziteta su predstavljeni vrhovima: Treskavica, Zelena gromila, Stražica, Runjevica, Vratolom i Krstac.

#### 3. Hidrološka raznolikost

- ovršinska hidrološka mreža je veoma razvijena, i pored navedene Jezernice najpoznatiji su: Zavol, Runjevički i Džehenemski potok.
- poznata je i grupa kontaktnih izvora Jezerca u jugoistočnom dijelu zone.

#### 4. Biološka raznolikost

- visok procent endemičnih vrsta biljaka,
- veliki broj biljnih vrsta koje pripadaju kategorijama rijetkih, osjetljivih i ugroženih vrsta,
- visok stepen biocenološke raznolikosti, a posebno je značajna vegetacija oko izvora i potoka, te vegetacija snježnika, planinskih rudina i vriština, te različiti tipovi šuma subalpskog pojasa.

### Član 9.

Treća zaštićena zona (C zona – tranzicijska zona ) obuhvata prostor površine 1307.ha, u kome preovladava očuvanje izvornog stanja.

Granica obuhvata Treće zaštićene zone polazi sa najjužnije tačke granične linije na kontaktu sa općinskom granicom i predstavljena je orografskim sedlom u prostoru Vrata na 1850 m nadmorske visine ( $x = 6482248, y = 4865471$ ) odakle se preovlađujućim sjeveroistočnim smjerom obodom istočnih i jugostočnih padina Vrankuše spušta na lijevu stranu doline rijeke Borovnice na 1256 m visine ( $x = 6482821, y = 4866643$ ). Od nje granica povija u smjeru zapad-sjeverozapad do presjeka sa prvom lijevom pritokom rijeke Borovnice ( $x = 6482526, y = 4866795$ ) odakle ponovo dobiva provlađujući sjeveroistočni pravac prateći izohipsu 1300 m nadmorske visine do podnožja strmog odsjeka u prostoru Grablje gdje presjeca novu lijevu pritoku rijeke Borovnice na nadmorskoj visini od 1210 m ( $x = 6483504, y = 4868114$ ). Odavde granična linija povija prema sjeveru prateći ponovo izohipsu od 1300 m do koordinate  $x = 6483545, y = 4868804$  i dalje se hipsometrijski uzdiže i prati oblik izohipse 1450 m do koordinate  $x = 6483774, y = 4869192$ .

Granična linija se dalje prema sjeveru hipsometrijski spušta do presjeka sa šumskim putem na 770 m nadmorske visine ( $x = 6484069$ ,  $y = 4870221$ ), odakle i dalje prateći desnu stranu puta skreće prema zapadu do koordinate  $x = 6483548$ ,  $y = 4870250$ . Granica se u istom smjeru nastavlja na novom kontaktu sa velikom krivinom istoga puta na koordinati  $x = 6482959$ ,  $y = 4870357$ , odakle prateći desnu stranu preostalog dijela puta i izohipsu od 1250 m dolazi do koordinate  $x = 6482210$ ,  $y = 4871059$ . Od nje se spoljašnja granična linija nastavlja u smjeru sjever-sjeveroistok do prostora sjeverno od Vlaške ravni sa koordinatama:  $x = 6481868$ ,  $y = 4871861$ ;  $x = 6481759$ ,  $y = 4871908$ . Odavde granica dobiva preovlađujući zapadni smjer i hipsometrijski se spušta u prostor Tisova kosa na desnu stranu novog šumskog puta i dalje prema jugu presjeca Runjevički potok ( $x = 6480384$ ,  $y = 4871208$ ) i Džehenemski potok ( $x = 6480105$ ,  $y = 4871164$ ). Odavde granična linija presjeca općinsku granicu na koordinati  $x = 6479958$ ,  $y = 4871029$ , i dalje po sljedećim koordinatama:  $x = 6479878$ ,  $y = 4870785$ ;  $x = 6479703$ ,  $y = 4870479$ ;  $x = 6479575$ ,  $y = 4870207$ ;  $x = 6479072$ ,  $y = 4869557$ ;  $x = 6478936$ ,  $y = 4869478$ ;  $x = 6478069$ ,  $y = 4869174$ ;  $x = 6477928$ ,  $y = 4869071$ ;  $x = 6477816$ ,  $y = 4868970$ ;  $x = 6477855$ ,  $y = 4868201$ ;  $x = 6477994$ ,  $y = 4868011$ ;  $x = 6478155$ ,  $y = 4867974$ ;  $x = 6479958$ ,  $y = 4871029$ ;  $x = 6479227$ ,  $y = 4867909$ ,  $x = 6479378$ ,  $y = 4867894$ ;  $x = 6479568$ ,  $y = 4867817$ ;  $x = 6479641$ ,  $y = 4867647$ ;  $x = 6479689$ ,  $y = 4867348$ ;  $x = 6479956$ ,  $y = 4866348$ ;  $x = 6480090$ ,  $y = 4866220$ ;  $x = 6480187$ ,  $y = 4866103$ ;  $x = 6480309$ ,  $y = 4866050$ ;  $x = 6480875$ ,  $y = 4866066$ ;  $x = 6481288$ ,  $y = 4866002$ ;  $x = 6482248$ ,  $y = 4865471$ . Sa posljednjom koordinatom se zatvara krug Zone III – spoljašnje zone zaštićenog područja Prokoškog jezera.

Opis ovog područja rađen je sa karata novog premjera 1: 10 000.

#### Član 10.

Osnovne vrijednosti Treće zaštićene zone čine:

- slični elementi geološkog i geomorfološkog diverziteta.
- najznačajniji morfološki članovi ove zone su: Vrankuša, Stražica, Okruglača, Površca, Velikovac, i Džehenem.
- gotovo sva izvorišna čelenka Borovnice (Grozničavica i dr.) je razvijena u ovoj zoni.
- na sjeveroistoku se nalazi vodotok Sajevica koji je djelimično i granica ove zone.
- ekosistemi klekovine bora
- ekosistemi livadske vegetacije

#### Mjere zaštite

#### Član 11.

Aktivnosti u spomeniku prirode moraju biti usklađene sa ovim Zakonom, Planom upravljanja spomenikom prirode "Prokoško jezero" (u daljem tekstu: Plan upravljanja), propisima iz zaštite okoliša, prostornog uređenja, građenja i drugim važećim propisima.

#### Član 12

U prvoj zaštićenoj zoni mjere zaštite obuhvataju konzervaciju specifičnih prirodnih obilježja, a odnose se na:

- zabranu narušavanja ambijentalnih vrijednosti,
- zabranu eksploatacije mineralnih sirovina,
- zabranu lova i ribolova osim sanitarnog,
- zabranu sakupljanja ljekovitih biljaka,
- zabranu namjernog unošenja invazivnih vrsta,
- zabrana pašarenja u prostoru jezerske aluvijalne ravni,
- zabrana izgradnje svih vrsta objekata,
- zabrana isušivanja niskih tresetišta,
- zabranu narušavanja prirodnog hidrološkog režima,
- zabranu upotrebe otvorenog plamena,
- zabranu odlaganja čvrstog i tečnog otpada.

### **Član 13.**

U drugoj zaštićenoj zoni mjere zaštite obuhvataju očuvanje i zaštitu izvornog stanja, a odnose se na:

- zabranu sječe drveta (osim sanitarne sječe )
- zabranu lova osim sanitarnog,
- zabranu sakupljanja ljekovitih biljaka u komercijalne svrhe,
- zabranu namjernog unošenja invazivnih vrsta,
- zabranu saobraćaja vozilima bez posebnog odobrenja,
- zabranu izgradnje u zonama postojećih vrela,
- zabranu svih ostalih aktivnosti koje mogu remetiti namjenu zone.

### **Član 14.**

Mjere zaštite u Trećoj zaštićenoj zoni su usmjerene na očuvanje Prve i Druge zaštićene zone i održavanja izvornog stanja, a obuhvataju zabranu privrednih i drugih aktivnosti koje nisu usklađene sa statusom zaštićenog područja.

### **Član 15.**

Šumskoprivredne, vodoprivredne i lovnoprivredne osnove, uskladiće se sa mjerama zaštite utvrđenim ovim zakonom.

## **Aktivnosti u zaštićenom području**

### **Član 16.**

U prvoj zaštićenoj zoni dozvoljene aktivnosti su:

- pašarenja prema članu 12. alineja 6.,

- oplemenjivanje – ekološka restauracija postojećih hidrosistema (Prokoško jezero i izvori),
- rekreacija,
- unaprjeđenje infrastrukture (staze, klupe i sl.) za rekreaciju,
- uspostava elektroinstalacija u formi koja će biti uklopljena u ekološko prostorni ambijent,
- saobraćaj posebnim vozilima uz odobrenje,
- razvoj centralizovanog upravljanja otpadom (bez suvišnog odlaganja smeća u korpe),
- postavljanje informativnih sadržaja od prikladnih materijala.

#### **Član 17.**

U drugoj zaštićenoj zoni dozvoljene aktivnosti su.

- sanitarna sječa,
- ekstenzivno pašarenje,
- kosidba,
- rekreacija,
- edukacija i istraživanja,
- izgradnja edukacionog centra,
- izgradnja turističke infrastrukture koja će biti ambijentalno uklopljena,
- održavanje postojeće saobraćajne infreastrukture.

#### **Član 18.**

U trećoj zaštićenoj zoni dozvoljene aktivnosti su:

- poljoprivredna proizvodnja,
- razvoj male privrede i kućnih radinosti,
- izgradnja turističkih objekata za ljetni i zimski turizam u prosotru od Vlačke ravni do Hrida,
- izgradnja edukacionih centara,
- izgradnja javnih parking prostora za posjetioce.

### **Financiranje, korištenje i upravljanje**

#### **Član 19.**

Odluku o davanju Spomenika prirode na upravljanje, na prijedlog Vlade donosi Skupština kantona u roku od 6 mjeseci od dana stupanja na snagu ovog zakona.



Propisom iz prethodnog stava pobliže će se regulirati status upravljača, način finansiranja, prava i obaveze, odgovarajuće ovlasti u vezi sa upravljanjem i nadzorom, te odrediti nadležni organi za donošenje potrebnih provedbenih propisa.

## **Nadzor**

### **Član 20.**

Nadzor nad provođenjem odredaba ovog zakona vrši kantonalno ministarstvo nadležno za poslove zaštite okoliša.

Inspeksijski nadzor vrši Kantonalni inspektor zaštite okoliša, na način i pod uvjetima predviđenim Zakonom o zaštiti prirode.

## **Kaznene odredbe**

### **član 21.**

Za prekršioce odredbi članova 12., 13. i 14. ovog zakona shodno će se primjenjivati kaznene odredbe predviđene Zakonom o zaštiti prirode, te ostalih propisa iz oblasti zaštite okoliša.

## **Prijelazne i završne odredbe**

### **član 22.**

Nadležni organi su dužni donijeti ili uskladiti postojeću prostorno-plansku dokumentaciju sa odredbama ovog zakona u roku od 12 mjeseci od dana stupanja na snagu zakona.

### **član. 23.**

Plan upravljanja iz člana 11. ovog zakona donijeće Vlada kantona u roku od 12 mjeseci od dana donošenja ovog Zakona.

### **član 24.**

Ovaj zakon stupa na snagu osmog dana od dana objavljivanja u Službenim novinama Srednjobosanskog kantona.

Broj: \_\_\_\_\_

Travnik, \_\_\_\_ 2005 godine:

Predsjednik Sabora Kantona Središnja  
Bosna/Srednjobosanskog kantona

Velimir Valjan, Dr. med.

## O b r a z l o ž e n j e

### Zakonski osnov

Zakonski osnov za donošenje Zakona je sadržan u članu 30. stav 2. i 9. Zakona o zaštiti prirode («Sl. novine Federacije BiH», broj : 33/03) kojim je propisano da se spomenik prirode kao zaštićeno područje proglašava posebnim zakonom koji donosi zakonodavno tijelo kantona na prijedlog resornog kantonalnog ministarstva.

### Zaštićena područja – pojam

Zaštićeno područje je dio kopna i/ili mora određeno radi zaštite i održavanja biološke raznolikosti, prirodnih i kulturnih resursa, a prema kategorizaciji može biti kao zaštićeno prirodno područje, nacionalni park, spomenik prirode i zaštićeni krajolik

**Spomenik prirode** je vrsta zaštićenog područja s jednom ili više specifičnih prirodnih značajki od iznimne ili jedinstvene vrijednosti zbog svojih prirodnih, reprezentativnih ili estetskih svojstava ili kulturne važnosti.

### Razlozi za donošenje Zakona

Područje Prokoškog jezera smješteno na planini Vranici obuhvata prostor između dolina rijeke Vrbasa i dolina rijeke Bosne i njenih pritoka Bistrice i Fojničke rijeke. Unutar pomenutog područja postoje fodne vrijednosti koje su karakteristične po geološkoj, hidrološkoj i biološkoj raznolikosti, a kao takve predstavljaju iznimne i jedinstvene vrijednosti koje treba očuvati i zaštititi.

Inicijativu zaštite šireg područja planine Vranice i Prokoškog jezera, sredinom 2003. godine, pokrenula je Nevladina organizacija "Centri civilnih inicijativa" (CCI) iz Sarajeva.

Nakon načelne potpore, dobivene od nadležnog kantonalnog ministarstva, Centar civilnih inicijativa je otpočeo sa ciljanom i planski oskmišljenom kampanjom na projektu zaštite područja Prokoškog jezera.

Pored ovog Ministarstva u kampanju su uključeni: šira javnost, nadležni organi općine Fojnica, nevladine organizacije za promidžbu zaštite okoliša iz Fojnice i ostalih općina kantona.

Zatim se pristupilo organiziranju brojnih rasprava i okruglih stolova, izradi i distribuciji promotivnih materijala kojima su prezentirani značaj i ciljevi kampanje.

Paralelno sa navedenim aktivnostima su vršene konsultacije i sastanci sa predstavnicima ovog Ministarstva i Federalnog ministarstva prostornog uređenja i okoliša.

Posebno je vrijedno istaći kontakte sa predstavnicima Ministarstva prostornog uređenja i zaštite okoliša Sarajevskog kantona, koji su nam prenijeli iskustva na realizaciji nekoliko svojih projekata zaštite, a realizacija nekoliko njih je u toku.

Kampanja je dala značajne smjernice daljnjem radu, ukazujući na zaključak o potrebi izrade specijalističke studije u kojoj bi se na kompletan način evaluirale prirodne vrijednosti ovog prostora.

Uz načelni pristanak Ministarstva, CCI je finansijski podržao štampanje Studije "Prokoško jezero – spomenik prirode" koju je izradila grupa eminentnih stručnjaka specijalista sa PMF iz Sarajeva, okupljenih oko NVO-a "Greenway" Sarajevo.

CCI je Studiju dostavio Vladi kantona i resornom Ministarstvu na razmatranje i zatražio da se zauzme stajalište o pokretanju postupka sukladno važećim propisima.

Ministarstvo je nakon razmatranja Studije, ocijenilo opravdanom inicijativu o pokretanju postupka zaštite područja Prokoškog jezera.

Ovakva ocjena se temelji na činjenicama kojima Studija nedvojbeno ukazuje na nužnost i potrebu jednog novog i drugačijeg pristupa u valorizaciji, zaštiti (konzervaciji) i održivoj upotrebi prirodnih resursa na planini Vranici, a posebice jezera i šireg područja oko Prokoškog jezera (raznolikost endemičnih i reliktnih životinjskih i biljnih vrsta i njihovih zajednica i staništa i dr.).

Vlada KSB/SBK je svojim Zaključkom broj: 01-05-82/04 od 19.08.2004 godine zadužila ovo Ministarstvo da pokrene inicijativu za izradu Nacrta Zakona o proglašenju Prokoškog jezera Spomeniku prirode.

### Obrazloženje pojedinih odredbi Zakona

Članovima 2-10. Zakona definirano je samo zaštićeno područje, granice Spomenika prirode, zoniranje prostora sa specifikumima i osnovnim vrijednostima geološke, hidrološke i biološke raznolikosti, koji se naslanjaju na naučno znanstvenu studiju "**Prokoško jezero – spomenik prirode**", autora Mr. Sci, Samir Đug i Mr. Sci, Nusret Drešković ispred nevladine organizacije Greenway Konsalting.

Članom 11. propisano je da se dozvoljene aktivnosti imaju obavljati sukladno važećim propisima, a posebno su apostrofirane aktivnosti koje imaju karakter gradnje i zahvata u prostoru. Iste se prema članu ovog zakona imaju obavljati sukladno važećem Zakonu o prostornom uređenju i Zakonu o građenju. Pomenutim propisima jasno je definiran inspekcijski nadzor u vezi s gradnjom i uklanjanjem bespravno izgrađenih objekata.

U članovima 12.-15. propisane su mjere zaštite u tri zaštićene zone, koje se prvenstveno ogledaju u zabranama vršenja jasno nabrojanih aktivnosti i zahvata, a u cilju zaštite i očuvanja vrijednosti.

Članovima 16.-18. Zakona propisane su dozvoljene aktivnosti i intervencije unutar zaštićenih područja.

Članom 19. propisano je da će Skupština kantona, posebnom odlukom u roku od 6 mjeseci od dana stupanja na snagu zakona, odrediti upravljača nad spomenikom prirode, jasnije propisati način finansiranja kao i ostala prava i obaveze u vezi sa upravljanjem.

Članom 20. je propisano da nadzor nad primjenom zakona vrši Ministarstvo prostornog uređenja i zaštite okoliša, a inspekcijski nadzor Kantonalnom inspektoratu za zaštitu okoliša.

Članom 21. zakona je propisano da će se za prekršioce određenih odredbi zakona shodno primjenjivati kaznene odredbe Zakona o zaštiti prirode, te ostalih propisa iz oblasti zaštite okoliša. Prema članu 33. Zakona o zaštiti prirode tko prekrši zabranu utvrđenu propisom o proglašenju područja prirode zaštićenim, može se kazniti novčanom kaznom od 1.000,00 KM do 10.000,00 KM ukoliko se radi o pravnoj osobi, odnosno novčanom kaznom u iznosu od 200,00 KM do 500,00 KM, ukoliko je prekršitelj fizička osoba.

Sam zakon u ovoj fazi ne iziskuje izdvajanje značajnijih budžetskih sredstava. Značajna financijska sredstva biće potrebna nakon donošenja propisa iz člana 19. ovog zakona, čime će se osigurati da zacrtani ciljevi u ovom projektu budu u potpunosti ostvareni.